



**VERSCHNUUFFER
STAMM 2020**

STRAALSCH ODER STRAALSCH?

Grandios, Ganz Gwaltig, Giga Gschwind,
Gmaingfärlig, Git e Grangge Grind,
Grundsätzlich Glyych, Geniestraich Gar,
Grundlegend Gäld Gstyyrt Gilt Glasklar:
Geen d Grundgedangge Ganz ums Gäld,
isch s Gschee um d Gsundheit vo der Wält.

Y hoff, uf däre Lischte sin
au 5 vo Dyne G mit drin.
S isch schliesslig wichtig, dass e jeede
wo mecht in däre Sach mitreede,
sich ärscht gnoo föhlt und mir ihn gspyyre,
dermit mir d Mainig kenne styyre.

Es dien ys die 5G-Antenne
ganz zinfchtig Strom ins Hirni brenne.
E Schaade ka me noonig zaige,
doch die Elektro-Wälle haige
e schlächten Yyfluss, das syg gwiss,
voor däm hän mir natyyrlig schiss!

Jä, loone sich denn all die Straale,
falls mir mit unsrer Gsundheit zaale?
Isch s wirgglig neetig, sofort z wisse,
in was der Trump sich het verbissee?
Bruuchsch wirgglig Shitstorms via Twitter,
derzue Elektro-Smog und -gwitter?

Die Froog isch logisch rein rhetorisch,
au wenn mir saisch, dass das nid woor isch,
denn s landet uf em Abstellglais,
wär nid als Erschte sofort weiss,
dass es der Queen in Londe stinggt,
wenn ihre Harry farewell winkt!

Derzue muess y au sälber gstoo
so piinlig s deent, doch isch s eso,
es duet mi Iberwindig koschte:
uf Insta' lieb ych s Foodporn z poste!
Bim fätte Fleisch und au bim Wyy,
do loss ych s Poste aber syy...

Politisch fiehrt die Posterey
fascht tääglig zem e Riisegschrey:
Was het äggscht d Greta wider gmacht?
Isch s woor: Sy haig e erscht Mool glacht?
Sin s nid fake news mit Fotoshop?
Es wäggslet d Mainig top zue flop!

5G bringt ys global au nooch,
well s unabhängig vo der Sprooch
Agänte und Spioon voll gniesse
dass Infos ungfroggt aifach fliesse.
Die mien si nuur no redigiere
und fir d Regime e Bitz frisiere.

No all däm Stress in alte Zytte
mit Mäldeläuffer, Tuube, Grytte
wird Spioniere so ganz easy
zum Bürojob. Muesch nimm derby syy
bim ganz finale Rettigsschuss -
De faarsch der Compi aabe - Schluss!

Doch ganz so aifach isch es nid,
real isch, dass s d Bedrohig git,
im woore wie im cyber Lääbe.
drum muesch an Dyne Bildschirm glääbe.
So kasch grad sofort reagiere,
dermit nüt Gröbers ka bassiere.

S droot groossi Gfoor vom färne Oschte,
wo vyyle Lyt duet s Lääbe koschte.
Ob Compi oder Mensche Vire
presänt, ka me sy fascht nimm styyre.
S sin Zentrifuuge infiziert,
wär weiss, was im Iran bassiert?

Die Straale bringe-n-ys zem Schwitze
drum mien mir ys voor dääre schitze
Ych zieh e Silberkappe-n-aa,
dermit me mi nimm orte ka.
So gang y straalegschitzt jetzt hei,
und saag nach China: Huawei!

D Ladäärne-Uusstellig uff em Minschterplatz und
d Waage- und Reggwisyte-Uusstellig bi dr Kasärne!
Die sin vom Määntig znacht bis am Mittwoch demoorge!
Deert und an de 3 Verkaufsständ (CINS) in dr Stadt ka
men au alli Zeedel und Schnitzelbängg, d Blaggedde und
dr Rädäbäng kaufe.

Bisch e Kind, mechtsch Fasnacht mache,
denn git's kaini halbe Sache!
So schrib denn unsere Obmaa aa
und mäld Di gschwind zem Yyschtooo aa.

Yyneluege: Samschtig 14.03.2020
14.00-16.00 Uhr im Cliquekäller an dr Malzgasse 9 in Basel

Mir fraie uns uf Di!

Fir Informatione mäldsch Di bim Obmaa:
Pascal Studer, Verschnuuffer Gnepf, Malzgasse 9,
4052 Basel, E-Mail: gnepf@verschnuuffer.ch